

ტოპქარდის ხელშეკრულების პირობების ცალმხრივი ცვლილების შესახებ

გაცნობებთ და გთხოვთ, გაითვალისწინოთ, რომ თქვენსა და სს „პაშა ბანკ საქართველოს“ შორის გაფორმებული „ტოპქარდის“ ხელშეკრულების 6.1.2 პუნქტის შესაბამისად, ბანკი ცალმხრივად ცვლის ხელშეკრულების პირობებს, კერძოდ:

1. იცვლება ხელშეკრულების 1.3, 1.4, 1.9, 3.12, 4.2, 4.5, 5.1 და 6.1.5 პუნქტები, ასევე, ხელშეკრულებას ემატება 1.4¹, 3.12¹, 3.12², 3.12³ პუნქტები, მათი შინაარსი კი განისაზღვრება შემდეგნაირად:

„1.3 ტოპქარდის განვადების ლიმიტი (შემდგომში - „განვადების ლიმიტი“) - კრედიტის მოცულობა, რომელიც წინასწარ უმტკიცდება ტოპქარდის მფლობელს ბანკის მიერ და რომლის ფარგლებშიც, კლიენტს შეუძლია შესყიდვის წარმოება, მისი განაღდება (ასეთის არსებობის შემთხვევაში) ან მომსახურების საფასურის გადახდა პარტნიორი ან არაპარტნიორი ობიექტების ქსელში და კლიენტი ვალდებულია, წარმოქმნილი დავალიანება დაფაროს ხელშეკრულებით გათვალისწინებული პირობებით და ვადებში. განვადების ლიმიტის სხვაგვარი გამოყენება (გადარიცხვა, თანხის შეტანა/ჩარიცხვა და ა.შ.) დაუშვებელია. განვადების ლიმიტის ვალუტა არის ლარი.“

„1.4 პარტნიორი ობიექტი - კომერციული საქმიანობის განმახორციელებელი პირი, რომელიც სახელშეკრულებო ურთიერთობაში იმყოფება ბანკთან და კლიენტს შესაძლებლობა აქვს ტოპქარდის (განვადების ლიმიტის ფარგლებში) მეშვეობით განახორციელოს მის მიერ შეთავაზებული პროდუქტის/მომსახურების შესყიდვა განსხვავებული პირობებით, ვიდრე ეს განსაზღვრულია არაპარტნიორ ობიექტებში განვადების ლიმიტით სარგებლობისათვის (ასეთის არსებობის შემთხვევაში). პარტნიორი ობიექტების შესახებ კლიენტს ინფორმაცია შეუძლია მოიძიოს ბანკის ვებ-გვერდსა და ინტერნეტბანკში (ვებ-გვერდის მისამართი: <https://rebank.ge/ka/card/hot-offers-partners>);“

„1.4¹ არაპარტნიორი ობიექტი - კომერციული საქმიანობის განმახორციელებელი ყველა პირი (გარდა წინამდებარე ხელშეკრულების 1.4 პუნქტით განსაზღვრული პარტნიორი ობიექტებისა), რომელიც არ იმყოფება ბანკთან სახელშეკრულებო ურთიერთობაში და სადაც განვადების ლიმიტით სარგებლობისათვის შეიძლება დადგენილ იქნას განსხვავებული პირობები. არაპარტნიორ ობიექტებში ლიმიტით სარგებლობისათვის ბანკის მიერ დადგენილი პირობების შესახებ ინფორმაცია კლიენტს შეუძლია მოიძიოს ბანკის ვებ-გვერდსა და ინტერნეტბანკში (ვებ-გვერდის მისამართი - www.rebank.ge).“

„1.9 რეკომენდირებული გადასახადი – ყოველთვიურად გადასახდელი თანხა, რომლის გადახდის შემთხვევაშიც კლიენტს არ დაერიცხება პროცენტი. რეკომენდირებული გადასახადის დაანგარიშება ხდება ავტომატურად, ბანკის მიერ. კერძოდ, პარტნიორ ობიექტში გადახდილი თანხა/ტრანში იყოფა პარტნიორ ობიექტსა და ბანკს შორის დადებული ხელშეკრულებით გათვალისწინებულ ვადაზე, ხოლო არაპარტნიორ ობიექტებში გადახდილი თანხა/ტრანში ან/და განაღდებული თანხა განაღდების საკომისიოს ჩათვლით (ასეთის არსებობის შემთხვევაში) იყოფა ბანკის მიერ განსაზღვრულ ვადაზე, თუ წინამდებარე ან/და მხარეთა შორის გაფორმებული კონკრეტული ხელშეკრულებით სხვა რამ არ არის განსაზღვრული. პარტნიორ ობიექტსა და ბანკს შორის შეთანხმებული ვადის, ასევე, არაპარტნიორ ობიექტში ათვისებული ან/და განაღდებული ლიმიტის გადახდისათვის ბანკის მიერ დადგენილი ვადის შესახებ ინფორმაციის მიღება კლიენტს შეუძლია ბანკის ვებ-გვერდსა და ინტერნეტბანკში.“

*** წინამდებარე დოკუმენტი განკუთვნილია მხოლოდ ბანკის იმ მომხმარებლებისათვის, რომელთაც ტოპქარდი გადაეცათ 2020 წლის 06 აპრილამდე**

„3.12 ბანკის მიერ დამტკიცებული განვადების ლიმიტის ფარგლებში კლიენტი უფლებამოსილია, გაანაღდოს განვადების ლიმიტი ან/და უნაღდო ანგარიშსწორებით განახორციელოს პროდუქტის/მომსახურების შესყიდვა როგორც პარტნიორ, ისე არაპარტნიორ ობიექტთა ქსელში. ამასთან, კლიენტისთვის ცნობილია, რომ პარტნიორი ობიექტების ქსელში შესყიდვის განხორციელებისას ანგარიშსწორება ხდება განვადების ლიმიტიდან, მულტისავალუტო ანგარიშზე შესაბამისი თანხის არსებობის მიუხედავად. იმ შემთხვევაში, თუ განვადების ლიმიტი არ იქნება საკმარისი შესყიდვის განსახორციელებლად, თანხის დამატება მოხდება მულტისავალუტო ანგარიშიდან ავტომატურად, ამ ანგარიშზე საკმარისი ნაშთის არსებობისას.“

„3.12¹ კლიენტისთვის ცნობილია, რომ არაპარტნიორ ობიექტების ქსელში შესყიდვის განხორციელებისას - ანგარიშსწორება ხდება მულტისავალუტო ანგარიშზე განთავსებული თანხიდან. იმ შემთხვევაში, თუ მულტისავალუტო ანგარიშზე არ იქნება განთავსებული საკმარისი თანხა შესყიდვის განსახორციელებლად, თანხის დამატება მოხდება განვადების ლიმიტიდან. არაპარტნიორ ობიექტებში ლიმიტით სარგებლობისას, იმის გათვალისწინებით თუ რა დროს მოხდა ანგარიშსწორება, კლიენტი სარგებლობს 15-დან 45 დღემდე უპროცენტო განვადებით.“

„3.12² კლიენტისთვის ცნობილია, რომ ბანკი უფლებამოსილია, წინასწარ განსაზღვრული ვადით, საკუთარი შეხედულებისამებრ და მის მიერ განსაზღვრული ოდენობით, დაუშვას განვადების ლიმიტის განაღდების შესაძლებლობა. განვადების ლიმიტის სრულად ან ნაწილობრივ განაღდება შესაძლებელია ნებისმიერი ბანკომატის გამოყენებით. განვადების ლიმიტის განაღდებისას, იმის გათვალისწინებით თუ რა დროს მოხდა ლიმიტის განაღდება, კლიენტი სარგებლობს 15-დან 45 დღემდე უპროცენტო განვადებით. ამასთან, ტოპქარდის მეშვეობით თანხის განაღდებისას კლიენტი პირველ რიგში ახდენს მულტისავალუტო ანგარიშზე განთავსებული თანხის განაღდებას, მულტისავალუტო ანგარიშზე არასაკმარისი ნაშთის არსებობის შემთხვევაში კი განვადების ლიმიტის განაღდებას წინამდებარე ხელშეკრულებით გათვალისწინებული წესის შესაბამისად.“

„3.12³ კლიენტისთვის ცნობილია, რომ განვადების ლიმიტის განაღდების შემთხვევაში ბანკი უფლებამოსილია დაადგინოს განაღდების საკომისიო, რომელიც ჩამოიჭრდება განვადების ლიმიტიდან. ამასთან, კლიენტი ითვალისწინებს, რომ განვადების ლიმიტის განაღდება შეუძლებელია იმ შემთხვევაში თუ განვადების ლიმიტის თანხა არ არის საკმარისი განაღდების საკომისიოს დასაფარად.“

„4.2 რეკომენდირებული გადასახადის მოცულობა ცვალებადია და დამოკიდებულია კლიენტის მიერ ათვისებული ლიმიტის ოდენობაზე, პარტნიორ ობიექტებთან შეთანხმებულ განვადების პირობებზე, ბანკის მიერ განსაზღვრულ პირობებზე არაპარტნიორ ობიექტებში ლიმიტის გამოყენებასთან დაკავშირებით ან/და ლიმიტის განაღდებისათვის გასაზღვრულ პირობებზე. იმ შემთხვევაში, თუ საანგარიშო თვის განმავლობაში ლიმიტის გახარჯვა ხდება სხვადასხვა ობიექტების ქსელში ან/და ხდება ლიმიტის განაღდება, რეკომენდირებული გადასახადი დაჯამდება.“

„4.5 დაანგარიშების/ბილინგის თარიღში გადასახდელი თანხის დაანგარიშების დროს გაითვალისწინება კლიენტის მიერ რეალურად განხორციელებული გადახდები, წინა თვის განმავლობაში გახარჯული/განაღდებული განვადების ლიმიტი (ასეთის არსებობის შემთხვევაში), დარიცხული პროცენტი და წინა თვის განმავლობაში დარჩენილი დავალიანება (ასეთის არსებობის შემთხვევაში).“

*** წინამდებარე დოკუმენტი განკუთვნილია მხოლოდ ბანკის იმ მომხმარებლებისათვის, რომელთაც ტოპ|ქარდი გადაეცათ 2020 წლის 06 აპრილამდე**

“5.1 ყოველი თვის დაანგარიშების/ბილინგის თარიღში, კლიენტს მოკლე ტექსტური შეტყობინების საშუალებით ეცნობება ინფორმაცია მინიმალური და რეკომენდირებული გადასახადის შესახებ. ამასთან, ბანკი არ არის პასუხისმგებელი რაიმე ტექნიკური ხარვეზის გამო ან/და კლიენტის მიზეზით შეტყობინების მიუღებლობაზე და კლიენტი ვალდებულია, გადახდის თარიღისთვის მიმართოს ბანკს გადასახდელი თანხის შესახებ ინფორმაციის მისაღებად. ასევე, კლიენტი უფლებამოსილია, ინტერნეტბანკის მეშვეობით მიიღოს დეტალური ინფორმაცია, რომელიც მოიცავს შემდეგს:

- რეკომენდირებული გადასახდელი თანხა;
- მინიმალური გადასახდელი თანხა;
- დარიცხული ჯარიმები (ასეთის არსებობის შემთხვევაში);”

(წინამდებარე ცვლილება ძალაშია 2020 წლის 08 მაისიდან);

„6.1.5 კლიენტის ფინანსური მდგომარეობიდან, საკანონმდებლო მოთხოვნებიდან/რეგულაციებიდან ან/და , ბანკის შიდა პროცედურებიდან/წესებიდან გამომდინარე ან/და თავისი შეხედულებისამებრ, ბანკი უფლებამოსილია ნებისმიერ დროს, შეზღუდოს/დაბლოკოს განვადების ლიმიტი სრული მოცულობით ან ნაწილობრივ (მათ შორის, შეზღუდოს/დაბლოკოს ლიმიტის ფარგლებში გასანაღებელი თანხის მოცულობა სრულად ან ნაწილობრივ) ან გააუქმოს განვადების ლიმიტი ან/და განვადების ლიმიტის განაღდების შესაძლებლობა. განვადების ლიმიტის ან/და მის ფარგლებში გასანაღებელი თანხის მოცულობის შეზღუდვის/დაბლოკვის შემთხვევაში, ბანკი უფლებამოსილია დამოუკიდებლად მიიღოს გადაწყვეტილება შეზღუდვის მოხსნის თაობაზე და განვადების ლიმიტი ან/და ლიმიტის ფარგლებში გასანაღებელი თანხა განსაზღვროს თავდაპირველი მოცულობით. განვადების ლიმიტის ან/და განვადების ლიმიტის ფარგლებში გასანაღებელი თანხის მოცულობის დაბლოკვის/შეზღუდვის/გაუქმების შესახებ ან ბანკის მიერ დაწესებული შეზღუდვის გაუქმების შესახებ, კლიენტს ეცნობება წინამდებარე ხელშეკრულებით გათვალისწინებული წესის შესაბამისად გაგზავნილი შეტყობინების საფუძველზე.“ **(წინამდებარე ცვლილება ძალაშია 2020 წლის 08 მაისიდან);**

2. 2020 წლის 08 მაისიდან, უქმდება ხელშეკრულების 3.16 პუნქტით გათვალისწინებული პირობა ქემ-ბექის დარიცხვის თაობაზე.

3. 2020 წლის 08 მაისიდან, უქმდება ტოპ|ქარდის მულტისავალუტო ანგარიშზე განთავსებული ნებისმიერი მოცულობის თანხაზე საპროცენტო სარგებლის დარიცხვა;

შეგახსენებთ, რომ იმ შემთხვევაში თუ არ ეთანხმებით ზემოთ აღნიშნულ ცვლილებებს, უნდა გვაცნობოთ შეტყობინების მიღებიდან არაუგვიანეს 30 კალენდარული დღის ვადაში და უზრუნველყოთ ვალდებულების სრულად დაფარვა. ამასთან, იმ შემთხვევაში, თუ არ გამოიყენებთ აღნიშნულ უფლებას, შეთავაზებული ცვლილებები (დამატებები) ჩაითვლება თქვენს მიერ მიღებულად, ხელშეკრულება კი შეცვლილად, მითითებული პირობების შესაბამისად.

წინამდებარე ცვლილებები ძალაშია 2020 წლის 08 აპრილიდან, თუ წინამდებარე დოკუმენტით სხვა რამ არ არის გათვალისწინებული.